

四庫全書

史部

欽定四庫全書

史部

弇山堂別集卷八十三

詳校官編修_臣李潢

編修_臣裴謙覆勘

總校官中書_臣朱鈐

校對官學正_臣湯垣

謄錄舉人_臣李達泰

欽定四庫全書

余山堂別集卷八

科試考三

明 王世貞 撰

十五年丙午命左春坊左中允李本右春坊右贊善吳

山王順天試

命翰林院侍讀郭朴右春坊右中允孫陞主應天試

二十六年丁未命掌詹事府吏部左侍郎翰林院學士孫

承恩吏部左侍郎翰林院學士張治為考試官取中胡
正蒙等廷試賜李春芳張春胡正蒙及第改進士孫世
芳張思靜汪鏜孫朱大韶亢思謙胡杰毛起張居正殷
士儋林爌馬一龍張勉學謝登之藍璧黎澄李敏劉涇
趙鏜劉錫任士憑任有齡蔡文陳一松馬三才孫裒莫
如士為庶吉士命張治及吏部左侍郎兼學士徐階教
習後續命吏部左侍郎兼學士歐陽德林爌翰林廷機
子也

二十八年己酉命翰林院侍讀康太和右春坊右贊善
兼翰林院檢討閻樸主順天試

命翰林院侍讀敖銑修撰黃廷用主應天試

二十九年庚戌命禮部尚書文淵閣大學士張治吏部
左侍郎翰林院學士歐陽德為考試官取中傅夏器等
廷試賜唐汝楫姜金和呂調陽及第時以汝楫與首相
有連故得第云

三十一年壬子命左春坊左庶子兼翰林院侍讀郭朴

翰林院修撰秦鳴雷主順天試

命左春坊左中允兼翰林院修撰尹臺翰林院修撰郭
鑒主應天試

三十二年癸丑命少保太子太保禮部尚書東閣大學
士徐階翰林院侍講學士教銑為考試官取中曹大章
等廷試賜陳謹曹大章溫應祿及第是歲特開科凡四
百人改進士張四維王希烈姜寶萬浩南軒孫鉉吳可
行梁夢龍孫應鰲晁東吳孫九功馮華陸泰馬自強李

貴趙祖鵬呂旻方萬有胡汝嘉徐師曾王文炳姚弘謨
張巽言王學顏郭敬言李蒙蔣淳王詠為庶吉士命吏
部左侍郎翰林院學士程文德禮部左侍郎翰林院學
士閔如霖教習晁東吳翰林瑛子孫鋌吏侍陞子

三十四年乙卯命右春坊右諭德王維楨翰林院侍講
袁煒主順天試

命翰林院侍讀嚴訥潘晟主應天試

是歲上以應天試錄中詞旨不明且有所忤內閣大臣

為解釋其義乃寢

三十五年丙辰命太子太保禮部尚書文淵閣大學士
李本詹事府少詹事兼翰林院侍講學士尹臺為考試
官取中金達等廷試賜諸大綬陶大臨金達及第

戊午命太常少卿兼翰林院學士董份侍讀高拱主順天
試

命翰林院侍讀瞿景淳陳陞主應天試

己未命吏部右侍郎兼翰林學士掌詹事府事李機太

常寺少卿兼翰林院學士掌院事嚴訥為考試官取中
蔡茂春等廷試賜丁士美毛惇元林士章及第

四十年辛酉命司經局洗馬裴宇翰林院侍讀胡正蒙
主順天試

命右春坊右諭德兼翰林院侍讀吳情翰林院侍讀胡
杰主應天試

禮科都給事中丘岳等奏應天錄文既已傳布而考試
官吳情屢行更易胡杰不行救正乞分別究治得旨俱

調外任情遂調廣東市舶提舉杰廣平府通判吳君無錫人其邑之預薦者凡十餘人以是藉藉而胡之家僮有泄題而遁者未必皆有徇也其後胡旋起亦竟不利而吳以老不赴官自是南畿之在翰林者不得入南試以為例

四十一年壬戌命太子太保戶部尚書武英殿大學士袁煒吏部左侍郎兼翰林院學士掌詹事府事董份為考試官取中王錫爵等廷試賜申時行王錫爵余有丁

及第是歲煒承恩特賜白金文綺御膳於棘院份亦與
焉蓋異數也少保兵部尚書楊博左都御史潘恩以子
中式辭讀卷不許工部尚書雷禮以督工辭讀卷許之
仍敕列名于錄又特用吏部左侍郎李春芳不為例
是歲考庶吉士得旨行矣以科疏乞嚴覈罷不復考

四十三年甲子春禮部覆南道御史史官所陳兩京鄉
試草弊事宜一今後兩京主考不用本省人如資序挨
及南人用北北人用南以別嫌疑一同考用京官進士

出身者易詩書各二員春秋禮記各一員其餘參用教官以便覽察一膳錄用書手對讀用生員以防洗改但此三事專為兩京鄉試而設其各省及會試亦當因其說而廣之因更上四事一會試及兩京鄉試監試官預于二十日前選差以便防範一巡視揆檢務加嚴慎以杜奸弊一各省務精選才望內簾官無令外簾干預應舉生儒二十五名中一名中式之文務崇簡易凡浮繁冗褻詭僻不經悉行黜汰仍參取後場以采實學一解

原卷到部以憑稽查不用公據得旨各鄉試但照舊規
令監臨公同考官揭書出題提調監試等官不得干預
餘皆如議行

命司經局洗馬兼翰林院侍講林爌右春坊右贊善兼
翰林院檢討殷士儋主順天試

命左春坊左諭德兼翰林院侍讀汪鏜右春坊右中允
兼翰林院編修孫世芳主應天試世芳以病卒于貢院
輿尸而出同考官吏部主事蔡國珍代為後序是歲詔

自今兩京鄉試同考官仍擇文行俱優年力精壯教職充之罷部臣勿遣時給事中辛自修鄧楚望御史羅元祐交章摘發科場奸弊冒籍生員章禮等五人關節監生項元深等三人元深乃禮部主事戚元佐所薦同里人也于是自修等併劾元佐曹棟復言戶部尚書高燿薦屬官陳洙為考官托其子高堂遂得中式而外薦為之關節者即宛平縣丞高燦燿之親弟也踪跡顯然人所共知俱請論如法以振綱綱疏下禮部查議獨黜冒

之禁犯者執送法司問罪仍於禮部前枷號一月已邦
珍等條上革弊四事一舉人試卷禮部印鈐既完送提
調官收領臨期舉人入場至大門內驗票領以防洗改
脚色及彼此交換之弊一請留朝覲二司及府縣官臨
期督集所屬舉人照依省分及府縣次第挨次點驗序
進以防冒替代筆之弊一舉人有不服搜檢及攬先落
後不循序進如新規者輕則扶出重則叅奏以防喧競
抗違之弊一請增軍三百餘名嚴密搜檢場外仍選差

叅將官一員帶領官軍置夜巡邏俟揭曉乃止以防懷挾透漏之弊詔皆允行

命吏部左侍郎翰林院學士掌詹事府事高拱翰林院侍讀學士胡正蒙主試初場進題上以民之秉夷為忌問少師階欲究治拱等階解釋之乃已取中陳棟等四百人廷試賜范應期李自華陳棟及第是歲讀卷工部尚書管吏部左侍郎事董份亦用李春芳例也份遷禮部坐事為民與大學士袁煒以病故登科錄不載

是歲進士陶大順子允淳同科亦奇事也

改進士許國陳懿德戴洵沈淵周子義嚴用和韓楫楊
允中吳學詩李存文王湘沈鯉張秩高啓愚何洛文陳
思育陳行健林皆春楊一桂陳經邦王嘉言鍾繼英李
良臣管大勲成憲王璽王弘誨麻永吉為庶吉士命吏
部左侍郎兼翰林院學士高儀教習儀遷官禮部左侍
郎兼學士陳以勤代之

直隸提學御史耿定向奏科場事宜

一兩京鄉試主考官簡學行兼長者毋拘年資

一兩京同考官廣取正備卷呈送主考如所取未稱責
令再閱或付別房覆校主考仍自行搜閱落卷若果有
異材亟收錄之毋避嫌輕棄

一主考官宜發初場試卷付同考分經校閱二三場更
易品訂毋專委一人致令偏重初場遺真才積學之士
一邇來經書時義體制大壞有浮蔓至千餘字者宜嚴
立程式一篇止許五百字以上六百字以下違式者不

與謄錄

一命兩京各省於揭曉之日以中式舉人硃墨卷發提學官查驗鈐封送京府各布政司解部以防偽濫

一革去兩京應試監生字號與生員一體彌封取中之數仍如舊額滿三十五名則止已而御史陳聯芳亦言重後場以羅實學及令兩京同考閱卷不必書各房字樣主考止以文字去取毋以考官為額數分房為次第禮部議覆俱允行之

禮科給事中何起鳴奏申飭科場事宜一曰重懷挾之
罪一曰草傳遞之奸一曰慎同考之選一曰正諂諛之
風一曰預監臨之差一曰嚴誑騙之罰疏下禮部覆奏
得旨懷挾傳遞諸弊依議枷號重處今後科場搜檢不
嚴闕防不密責在外簾舉動不慎校閱不公責在內簾
禮部并都察院分別叅奏餘悉如議行遣御史凌儒陳
聯芳監順天鄉試

上以科場事宜邇年弊多諭儒等悉心綜理嚴加禁革

金史卷八十三
先是兩京監試御史皆臨期方遣禮部以為倉卒之際不便防奸故是歲遣官特早云

監順天鄉試御史凌儒陳聯芳條上科場六弊一買求二倩代三通同四夾帶五傳遞六偏重請盡行釐革上皆從之內偏重一事謂考官故抑貢生及世家子弟蓋臆說云

隆慶元年丁卯命右春坊右諭德兼翰林院修撰丁士美右春坊右中允兼翰林院編修張四維主順天試

命左春坊左諭德兼翰林院侍讀王希烈左春坊左中
允兼翰林院編修孫鋌主應天試

初上用議者言兩京鄉試監生卷各草去四字號於是
南監中式中僅數人虧舊額四分之三既揭曉後考試
官王希烈孫鋌等至國學謁文廟而監生下第者數百
人喧譟於門外伺希烈等出遮訴語甚不遜巡城御史
操江都御史各使人呵止之久之方解事聞詔南京法
司逮治其為首沈應元等數人如法發遣祭酒呂調陽

蒞任未幾且勿論守備魏國公徐鵬舉以聞變坐視奪
祿米司業金達以鈐束不嚴奪俸各二月監生編號如
舊行

二年戊辰命少傅太子太師吏部尚書建極殿大學士
李春芳掌詹事府禮部尚書兼翰林院學士殷士儋主
試取中田一儁等四百人廷試賜羅萬化黃鳳翔趙志
舉及第先是內閣所取李長春王家屏田一儁已定矣
內旨忽於二甲前進呈卷用萬化等而李長春三人居

二甲前是歲少傳大學士陳以勤以子陳于陞通政使
李一元以第一中辭讀卷許之登科錄亦不列姓名

改進士徐顯卿陳于陞張一桂沈一貫李長春韓世能
賈三近王家屏田一儁朱賡沈懋孝張位李熙林景暘
徐秋鶚張道明邵陞何維椅沈位李維楨郭莊王喬桂
劉東星于慎行范謙張書李學一習孔教劉應麒鄭國
仕為庶吉士

四年庚午命右春坊右諭德蕙翰林侍讀丁士美翰林

院修撰申時行主順天試

進鄉試錄有重葉者奪府丞宋纁諭德丁士美修撰申時行俸各兩月

命司經局洗馬兼翰林院侍講馬自強翰林院侍讀陶大臨主應天試

時江西提學副使陳萬言以科舉校士遺落者悉詣巡按御史劉思問求覆校幾四萬人思問與期會都司署中旦日思問未至士爭門入駢雜喧亂都指揮王國光

呵叱之退相蹂踐死者六十餘人是歲鄉試南昌知縣
劉紹恤主彌封紹恤在縣中有素所獎拔士試而中者
二人士論譁然謂紹恤私二人從落卷搜出改洗冒中
於是南科道官請謫思問萬言罷紹恤并黜二生下吏
禮二部議思問無罪國光行撫臣逮問二人中式紹恤
實不私然不應招致門下以起事端其與萬言俱以不
及調用奏可

五年辛未命少傅太子太傅吏部尚書建極殿大學士

張居正掌詹事府事吏部左侍郎兼翰林院學士呂調陽主會試取中鄧以讚等四百人廷試賜張元忭劉珏鄧以讚及第

改進士趙用賢黃洪憲盛訥劉虞夔吳中行公家臣蕭崇業宋儒張程王祖嫡宋范趙燿劉諧史鉅石應岳趙參魯王守成王懋德李盛春秦燿熊敦樸趙鵬程劉元震何汝成劉楚先劉克正孫成名張應元盛彬孫訓為庶吉士

萬曆元年癸酉命右春坊右諭德兼翰林院侍讀王錫爵左春坊左中允兼翰林院編修陳經邦主順天試命左春坊左中允兼翰林院編修范應期右春坊右中允兼翰林院編修何洛文主應天試

是歲少師張居正子嗣文在湖廣者得薦其試順天者懋修不得薦

萬曆二年甲戌命太子太保禮部尚書武英殿大學士呂調陽吏部左侍郎兼翰林院學士掌詹事府事王希

烈主會試取中孫燝等三百人廷試賜孫繼臯王應選
余孟麟及第張嗣文不與中式

萬曆四年丙子命右春坊右中允蕙翰林院編修何洛
文右春坊右贊善蕙翰林院檢討許國主順天試

命右春坊右中允蕙翰林院編修戴洵右春坊右贊善
蕙翰林院檢討陳思育主應天試

是歲內閣大學士張居正次子嗣修中順天式呂調陽
子興周中廣西式張四維次子嘉徵中山西式

南都主試者戴洵以故中允孫世芳為屬中之病甚閔
卷事皆屬之思育

五年丁丑命禮部尚書東閣大學士張四維詹事府詹事
兼翰林院侍讀學士掌院事申時行主會試取中馮夢
禎等四百人嗣修興周復與焉

廷試少師兼太子太師吏部尚書中極殿大學士張居
正少保太子太傅戶部尚書武英殿大學士呂調陽少
保太子太保刑部尚書王崇古以子嫌辭讀卷不許賜

沈懋學張嗣修曾朝節及第

是歲讀卷官初擬宋希堯為第一而嗣修在第二甲第二上拆卷得之擢置嗣修第二且謂居正曰朕無以報先生功當看先生子孫後始知慈壽及大璫馮保意也
宋希堯遂二甲第一

改進士沈自邠楊起元楊德政教文禎何洛書張鼎思
甘雨高尚忠張養蒙萬象春馬象乾姚岳祥余繼登顧
紹芳史繼辰曹一鵬王國費尚伊張志張文熙陸可教

汪言臣馮夢禎林休徵李植莊履豐吳堯弼馮琦為庶吉士

七年己卯命左春坊左諭德兼翰林院侍讀陳思育司經局洗馬兼翰林院修撰周子義主順天試

命右春坊右中允兼翰林院編修高啟愚翰林院侍讀羅萬化主應天試故事中允與講讀對品中允得入門序揖前導雙呵講讀不得也然至主兩京試及修史列銜則皆講讀前而中允後行之二百餘年不易至是忽

改命啟愚主試萬化副之云自政府意也是歲首輔居
正子懋修湖廣鄉試中式

八年庚辰命禮部尚書文淵閣大學士申時行禮部左
侍郎兼翰林院侍讀學士余有丁主會試取中蕭良有
等三百人時懋修與其兄敬修次輔張四維子嘉徵復
俱中式敬修即嗣文更名者

廷試少師兼太子太師吏部尚書中樞殿大學士張居
正少保太子太保禮部尚書武英殿大學士張四維俱

以子入試請迴避不許賜張懋修蕭良有王廷謨及第
懋修有兄敬修良有弟良譽廷謨弟廷諭同榜進士或
云首輔戲之也

十年壬午命右春坊右庶子兼翰林院侍讀朱賡翰林
院侍講韓世能主順天試

命右春坊右贊善沈鯉翰林院修撰沈懋孝主應天試
鯉于庭陛辭日擢侍讀學士掌院矣

是歲新首輔少師張四維子田徵中山西鄉試第二名

太宰王國光子

闕

亦與選次輔太子太保申時行子

用懋中順天試第六次子用嘉復中浙江試初外議
藉藉皆謂楚解元必前首輔太師張居正少子會居正
卒不果而復中少宰王篆子之衡南京亦中篆子之鼎
篆居正所幸也於是南京給事中疏論居正前私其子
嗣修懋修敬修登第而併及篆二子又及監試主考等
官有旨以居正篆權姦諸子俱勒為民而不究試事
十一年癸未命太子太保禮部尚書文淵閣大學士余

有丁掌詹事府吏部左侍郎翰林院學士許國主會試
取中舉人李廷機等廷機福建解元也

廷試少師兼太子太師吏部尚書中樞殿大學士張四
維少保兼太子太保戶部尚書武英殿大學士申時行
以子田徵用懋中式引嫌辭讀卷不許賜朱國祚李廷
機劉應秋及第

時御史魏允貞條呈行事中一欵論二相子不當中第
二相臣俱有疏辯辭甚峻允貞坐外謫

改進士李道統史孟麟周應賓胡時麟方從哲葉向高
鄒德溥姜應麟邵庶葛儀舒弘緒徐應聘吳龍徵王萱
劉大武楊元祥楊鳳梅鵬祚梅國樓徐大化楊紹程王
之棟郭正域范醇敬沈權陳良軸鄧宗齡甯中立為庶
吉士命吏部左侍郎兼翰林院學士陳經邦禮部左侍
郎兼翰林院侍讀學士周子義教習

萬曆十三年乙酉二月禮部疏議覆科場事宜祛積弊
以光盛典事該禮科等衙門萬象春楊廷相等條議前

事大要於科場之弊各有所見欲懲前慮後稍有變通以垂永久其意甚善臣等謹各據所陳叅互考訂間附已意蓋人言可采不必其盡出于已而已見可施不必其盡同于人惟求釐弊既往貽法將來以仰裨我國家掄才至意其間有監臨主司可徑自施行與無關大體者亦不敢槩行議覆撮其切要數事列款議擬上請伏候聖明裁定勅下臣等轉行各該衙門一體欽遵施行庶諸臣之所見必酬而臣等之職分少塞矣

一議京考令甲兩京鄉試府臣先期題請試官上命詞臣二員往典厥事一切分考充以四方文學之臣及辦事進士甲科有司等官最善制也乃各省則獨有不然者豈京考之制可行于畿甸而不可行于各省耶甚非聖世同文之治也查得嘉靖六年本部題准各省鄉試比照兩京事例遣京官二員前去主考一時號為得人乃行之二科輒以報罷則以監臨主考禮節小嫌遂使同文大典不無畿省之異今科臣象春有見于此議重

內簾廷相議擇內簾之官繼先議照嘉靖六年事例用京官主考其意相同俱可依議合無仍照舊例凡遇鄉試之年各省巡按先期奏請本部具題于在廷諸臣訪其學行兼優者疏名上請每省分遣二員主考至用何等衙門臨期取自上裁仍量道里遠近以為點差先後其他分考不妨照舊每經各聘教官一員各該巡按及提學官務要嚴加考選限三科以下卓有文行方准應聘不許濫取充數仍于本省甲科有司監臨時揀選數

員同充考試簾以內一意校閱不得徇私干犯簾以外
一意糾察不得越俎侵事有不然者各所司叅奏至于
禮節坐次之間應繼先所議奉命典試諸臣在監臨提
調之上不得仍前爭競以傷大體以致阻格庶京省一
體文教同風此試官之所當議也

一議程式夫士子中式既籍其名以獻矣并錄其文以
風四方制也后乃惟主司代為之所錄非所取致使草
茅自獻之意蕩然無遺非以樹向往之的明正始之義

也且先時預擬有洩漏之嫌臨卷搞詞妨校閱之務緩其所急而急其所緩計莫有不便于此者夫入彀之英文必可采而裒集即可成錄縱風簷未盡所長主司者一刪潤之足矣奚必窮年累月躬自撰擬而后為工哉先是科臣王士性曾有此議今萬象春張棟所陳俱為有見行令兩京各省考試官今後場中不許撰文就將中式文卷其純正典實足為程式者依制刊刻其後場果學問該博洞悉時務者即前場稍有未純亦許甄拔登

錄以示崇重實學之意中間有字句煩複文不甚安而才思充滿者不妨稍為修飾但不許增損過多致掩初意仍候錄卷解部之日本部即行比對有仍前代撰者參奏罰治若謂場中之校閱甚煩而鎖闈之時日有限必候取定士子之文斟酌登錄恐致稽遲合無少破舊例姑限次月初旬開榜似亦無害如此則庶乎事體從容文皆實錄而四方之士咸彬彬然求合于矩度矣此試錄之所當議也

一議進題查得京闈鄉試會試進題御覽一以見臣子
執事之恪一以慰聖明側席之懷由來久矣顧繕寫不
正則蹈欺慢進呈不早則致稽遲不得不預擇善書之
人徹夜書寫以圖早進乃洩漏之弊往往在此夫以京
闈近在輦轂之下而不以題聞臣子所不敢也以進呈之
故而時刻轉相洩漏致辱盛典尤臣子所不安也合無
擬題已定先莊寫一通向闕設案捧至其考試等官行
一拜三叩頭禮待士子散題已畢然後進呈大約不出

辰卯二時則庶乎不失臣子敬慎之忱而亦可免先時洩漏之患此進題之所當議也

一議覈卷為照士子三試墨卷謄寫送部名為公據硃卷猶未解部也續經言官建議硃墨二卷一併解部不許謄寫真跡尚在一有物議即可取而評之公私立辨法甚當也顧行之未久旋復如故殊失解卷初意今科臣萬象春議要于各省直揭曉之後即將硃墨真卷解部本部會同該科辨驗是否原卷通行嚴閱如有文理

不通者量行奏斥一二以示戒懲相應依擬合無通行各該衙門查照該科所議即于揭榜三日之內發解試卷仍以揭榜日期容臣等會同叅閱施行至于閱過數卷亦宜申飭所司盡數收貯以備不時查核如有私自傳覽致有遺失者責在典守此核卷之所當議也

一議覆試為照朝廷設科取士法嚴令行且二百年來未聞有假公典以濟已私者近因一二夤緣之徒犯科

作奸被論削籍殊玷盛典今科臣萬象春張維新俱建
議覆試先是王士性議亦及此誠為革奸之法顧諸臣
所見不同言亦稍異在萬象春則泛指形迹著聞為人
指摘者在張維新則槩指大臣子弟在王士性則直指
京堂三品以上子弟臣等反覆思惟覆試之說緣實跡
者不問大臣及民間子弟即行叅奏勅下本部會同都
察院該科并原奏官鎖院覆試闕防搜檢一切如故若
係南京科道官叅奏者不必會同試題大要明白正大

經書論策四篇而止比照中式卷不甚相遠即准中式甚荒謬不堪者請旨斥落為民被參舉人或有當年丁憂與自揣不堪遷延規避不赴會試者行原籍起送如中途稱病及到部稱病不出或被參在逃者即行除名不必覆試併咨到司坐以應得之罪夫待參奏而行覆試則真才不蒙謗而被疑覆試而因參奏官員則夤緣者難匿瑕而掩垢凡參奏者即槩行嚴試則法令均一人皆不敢有倖進之心庶乎事制曲防弊端永絕得人

之盛恒必由之矣此覆試之所當議也

一議闕防為照京闈欽差監試二員非但防範糾察乃其專責即場中事務孰非倚重而責成之者其任亦重且鉅矣查得往年監試御史被命之後不即入院雖稱往來監督似非事體且既奉有專責亦宜自為闕防合無今後監試御史即於欽遣次日入院至於聘到考官舊規順天安插豈不稱便臣等切謂府門之啟閉無時而從役之往來甚煩名為闕防實乃故事查得三場考

選例有巡視御史二員合無今後考官到京送赴察院
嚴加扃鑰多撥兵番巡察或即同起居尤為慎密候順
天府會宴之日即于是早伴行入朝主考監試等官陞
辭交割監試御史方回南京鄉試查照前例一體遵行
庶可杜絕奸弊此闕防之所當議也今據科臣所見與
臣等所議覆者雖大槩有此數端而內簾不許撰錄與
外簾不許閱卷似尤為切要者蓋主司不分心於試錄
則校閱精而去取必當監臨不分心於試卷則防檢密

而奸弊不生庶乎祖制可復臣職可明而弊習亦頓革
故臣等以是為要宜嚴行申飭者也抑臣又有說焉薦
賢為國者蓋臣之上務也明罰勅法者哲后之大機也
臣所議數事亦有經言官條議部臣題覆者豈不班班
可考然有視為冗談漫不加意彼其敢于抗明詔而樂
因循者何也則罰之輕而人易犯之也況未必罰乎今
科臣張棟欲請陛下復嚴禁之罰其見良是合無自後
各省直考校監試等官敢有沿襲舊套故違明禁者即

重行議處則法嚴而人心知畏弊有不盡釐遴選有不盡公者臣等所不信也如兩京監試不許與聞編號布按二司不許仍充總裁減外簾以省奔命之煩局各房以杜通同之弊禁積役以屏傳遞之奸與夫文格之當辨也士習之當正也諸臣所議纖悉具備均于重典有裨是在監試主試督學諸臣一加意焉可無俟臣等喋喋矣伏候聖裁奉聖旨科場事宜既酌議停當各處試官准照嘉靖七年例差用還酌量地方遠近先期奏請

監臨等官不許干預內簾事務其餘俱依擬著實遵行
有故違的你部裏及該科叅奏重治

弇山堂別集卷八十三

欽定四庫全書

弇山堂別集卷八十四

明 王世貞 撰

科試考四

乙酉命左春坊左諭德兼翰林院侍讀張一桂司經局
洗馬兼修撰陳子陸主順天試

命左春坊左諭德兼翰林院侍讀于慎行右春坊右中
允兼翰林院脩撰李長春主應天試

分命翰林院修撰孫繼皋主浙江翰林院編修黃洪憲
主福建翰林院編修史珂主湖廣翰林院編修余孟麟
主江西試餘用六科給事中各部員外郎主事有差珂
辭改命編修張應元是歲科場甫畢上命順天府官
以中式舉子卷入內將加檢勘已而發還無所問
先是浙人胡正道等以二月入都冒通州籍入學
遂得中式者八人為馮詩章維寧史記純陳邦訓
楊日章董邵孫喙都下人士閤然不平投匿名文書訴

中式不應皆外郡及各州縣進學之弊給事中鍾羽正
劾奏請清冒籍生儒上下其章於法司而順天府生員
張元吉者父故富商交通宦倖遂益鼓煽其詭言考官
有私並及提學飛語乃聞內上愈疑法司勘上有旨六
人者發原籍為民史記純係編修史珂子以珂縱子冒
籍亦褫職而并疑馮詩章維寧曾館主考張一桂家復
下法司再從公審究意在必坐考官於是尚書舒化左
都御史趙錦禮刑二科都給事王三餘顧問會多官廷

勦詩維寧有無關節各加刑拷具覆言詩維寧館張不
過數月家貧而其試卷取中又非獨出張手委無隱情
疏上上終以扶同回護為疑詔張一桂改南京別衙門
用詩維寧各枷示衆發為民并謫提學御史董裕於外
仍諭天下巡按御史各覈諸新舉子復原籍為諸生及
削籍者凡十餘人是舉上雖有意嚴釐科場弊習然京
師頗傳其譖出於宮闈及訊獄具都御史錦欲勿用一
桂係講官非臣等所敢擅擬向尚書化執不肯盖示隙

端聽上自處議者薄之而給事中史孟麟御史蔡時鼎
疏言冒籍之當寬采訪之當慎切責時鼎降馬邑典史
孟麟疏取出不果上

前甲申御史丁此呂追論禮部左侍郎兼翰林侍讀學
士高啟愚主試應天時命題舜亦以命禹為阿附故太
師張居正有勸進受禪之意為大不敬得旨免究矣吏
部參論此呂謫外遂奪啟愚官削籍還里并收其三代
誥命諸大臣與言路相持者久之乃定山東則吏部尚

書楊巍子中式山西東閣大學士王家屏子濬初中解
元湖廣巡按御史論推官李槃用強侵各試官權多取
諸生禮部員外郎李同芳故庇之不行裁沮得旨降級
調用同芳罰俸三月

十四年丙戌命禮部尚書文淵閣大學士王錫爵掌詹
事府吏部左侍郎兼翰林院侍讀學士周子義充考試
官取中袁宗道等是歲以言官請取三百五十人著為
令

廷試賜唐文獻楊道賓舒弘志及第先是內閣大臣申
時行等擬袁宗道第二人道賓第三人而宗道卷屬大
學士許國讀音楚上意不懌寘之二甲第一而拔進呈
最末卷弘志第三弘志巡撫廣西右副都御史應龍子
年十九策奇麗甚而語多刺譏時政且侵言官之橫者
大臣惜而不敢顯置之前上忽拔之中外驚異稱服以
上神明且得人也

四月命內閣吏禮二部翰林院堂上官會選進士袁宗

道劉弘寶王孟煦吳應賓薛三才王圖蕭雲舉全天叙
王道正李沂彭烱林祖述黃汝良趙標林承芳曾礪胡
克儉劉為楫十八人為庶吉士改禮部左侍郎兼侍讀
學士朱賡為吏部左侍郎少詹事兼侍讀學士張位為
禮部右侍郎兼侍讀學士俱如故教習前是言官請每
歲考庶吉士其選數與留數俱不必多得旨如請故止
十八人蓋少三之一也

是歲南京禮科給事朱維藩極論新陞南京國子監司

業沈懋孝前以翰林院修撰主壬午應天試時得安福
劉士理丹陽賀學禮上海王尚行嘉興包文燭一用銀
各千餘兩取中鄉試及阿附故權臣王篆子之鼎俱濫
中鄉舉詔勒懋孝解官回籍聽候發落而命各巡按御
史遣官押解諸舉人赴京覆試凡再閱月俱抵京於午
門前試三日禮部尚書侍郎給事中御史錦衣衛堂上
官督覈文成內閣尚書會閱卷士理等四名皆文理平
通准應會試賀學禮發為民學禮實房考教官所薦也

懋孝降一級調外任補兩淮鹽運判官不赴

監場御史林應訓張一鯤以故為王篆子道地貼號先後勒為民時應訓已轉南尚寶卿一鯤移疾請告矣尚書沈鯉以王篆子實其所取乞休且請弔原卷覆查溫旨不聽辭

十六年禮部叅浙江提學僉事蘓濬江西提學副使沈九疇取優等卷怪詭濬等各罰俸兩月諸生發充社

題為士風隨文體一壞懇乞聖明嚴禁約以正人心事

儀制清吏司案呈照得近年以來科場文字漸趨奇詭而坊間所刻及各處士子之所肄習者更益怪異不經致誤初學轉相視效及今不為嚴禁恐益灌漬人心浸尋世道其害甚于洪水甚于異端蓋人惟一心方其科舉之時既可用之以詭遇獲禽逮其機括已熟服役在官苟可得志何所不為是其所壞者不止文體一節而亦于世道人心大有關係相應題請申飭以遏狂瀾等因案呈到部臣等看得言者心之聲而文者言之華也

其心坦夷者其文必平正典實其心光明者其文必通達爽暢其不然者反是是文章之有驗于性術也如此唐初尚靡麗而士趨浮薄宋初尚鈎棘而人習險譎是文章之有關於世教也又如此洪武三年詔頒取士條格五經義限五百字以上四書義限三百字以上論亦如之策限一千字以上惟務直述不尚文藻仁宗朝俞廷輔奏准科目取士務求文辭典雅議論切實者進之憲宗諭詹事黎淳曰出題刊文務依經按傳文理純正

者為式故今鄉會試進呈錄文必曰中式則典雅切實
文理純正者祖宗之式也今士子之為文式乎不式乎
自臣等初習舉業見有用六經語者其後以六經為濫
套而引用左傳國語矣又數年以左國為常談而引用
史記漢書矣史漢窮而用六子六子窮而用百家甚至
取佛經道藏摘其句法口語而用之鑿朴散淳離經叛
道文章之流弊至是極矣乃文體則恥循矩矱喜創新
格以清虛不實講為妙以艱澁不可讀為工用眼底不

常見之字謂為博聞道人間不必有之言謂為玄解苟
奇矣理不必通苟新矣題不必合斷聖賢語脉以就已
之鋪叙出自已意見以亂道之經常及一一細與鮮明
則語語都無深識白日青天之下為杳冥魍魎之談此
世間一怪異事也夫出險僻奇怪之言而謂其為正大
光明之士作玄虛浮蔓之語而謂其為典雅篤實之人
也可乎如謂人自人而言自言也則以文取士者獨以其
文而已乎抑孟子之所謂生于其心害于其政者豈無

稽之言乎臣等不以文為重而為世道人心計心竊憂之嘗謂古今書籍有益於身心治道如四書五經性理司馬光通鑑真德秀大學衍義丘濬衍義補大明律會典文獻通考諸書已經頒行學宮及著在令甲皆諸生所宜講誦其間寒素之士不能遍讀者臣等不能強博雅之士涉獵羣書者臣等不敢禁但使官師所訓迪提學所課試鄉會試所舉進者非是不得旁及焉仍乞容臣等會同翰林院掌印官將弘治正德及嘉靖初年一

二三場中式文字取其純正典雅者或百餘篇或十數
篇刊布學宮以為準則使官師所訓迪提學所課試鄉
會試所舉進者非是不得濫取焉除鄉會試已經臣等
題奉欽依遇場屋揭曉後各該提調官即將中式硃卷
盡數解部逐一叅閱有犯前項禁約者隨即指名叅閱
外其各省直提學官各持一方文衡手所高下人皆嚮
風轉移士習尤為緊切如使膠庠之所作養者皆務為
險僻奇怪之文而開科取士之時欲合乎平正通達之

式臣等竊知其無是理也乃往時止于科舉年分稍一
申飭其各省直小考則任其變亂程式置之不問是謂
濁以源而求其流之清也不可得已合無恭候命下容
臣等咨都察院行兩直隸提學御史及各省巡按御史
轉行各該提學憲臣務仰體朝廷德意相率以正文體
端士習轉移世道為已任而不以厭常喜新標奇攬異
取快於口耳聲名為諸士倡始平時訓諭師生惟將前
項經書史籍隨其所習考核講究務令貫通至于臨場

校閱品題高下則一以見今頒行文體為式如復有前
項險僻奇怪決裂繩尺及于經義之中引用莊列釋
老等書句語者即使文采可觀亦不得甄錄且摘其甚
者痛加懲抑以示法程仍將考過所屬府州縣衛運司
儒學生員原取優卷前五名或三名以上者歲終解部
科舉年場屋畢解部臣等逐一考驗不許另有謄改如
有故違明旨沿襲前弊壞亂文體者定將提學官分別
卷數多寡題請罰治本生行提學道黜退除名仍乞勅

下吏部今後考課提調學校官員一視其能正文體與否以為殿最其解部考卷容臣等閱畢咨送吏部一體考驗施行伏乞聖裁等因萬曆十五年二月初六日本部尚書兼翰林院學士沈鯉等具題初九日奉聖旨是近來文體輕浮險怪大壞士習依擬著各該提學官痛革前弊仍將考取優卷送部稽查如有故違的你部裏摘出開送內閣從重參治科場後參閱硃卷節年題有定例今後也要著實舉行毋事空言欽此

六月內禮部覆禮科都給事中苗朝陽疏

查得各省直同考先該南京禮部尚書姜寶議欲盡用有司已經本部題奉欽依酌量兼用今該科猶恐試卷數多各經同考僅有數員窮日校閱易得潦草欲以本省甲科有司選其學行俱優者易詩書各增二員春秋禮記各增一員使得從容校閱相應依議但計各省應試人數多寡不等又或偶有一經于彼獨多于此獨少亦難局定負數惟應總計場中五經試卷酌量增添

取其適用而止如或偏遠省分偶乏科甲有司即于鄉試中出身者一體選用但不可逐次增加啟濫觴之端閱卷完日主考二員即將各房落卷盡數取出會同各經房考互相搜檢拔其所遺呈之主考當面裁定定已畢通將取中試卷均分各經房考加以印記互相評品先是同考官員雖有去取止用浮帖開具批語不可直書卷上令人先有成心也前次題差京考之時亦令酌量道里遠近稍加餘日以備陰雨計今各處凶荒道路

梗塞似應更早數日以寬靡及之懷冒籍生儒先年累奉明旨發行禁草今該大比之年本部已曾通行申飭去後茲據該科建議猶恐人情易玩合候命下移咨都察院行各監臨御史各提學嚴督所屬提調及儒學官將應試生儒逐一查覈保勘但有冒籍來歷不明之人一槩不准送考已在取中者即據實申報不准入試如有疎畧容隱或被人報訐或中後事發本生照例黜退教官并保勘生員鄰里人等坐贓究問如律有司及提

調官叅奏罰治各該監臨御史先曾題奉欽依科場已
畢即查中式人等中間有無冒籍人等具奏一次今宜
限定本年十二月以前通行奏到如有場屋前後交代
接管者俱宜一體遵行本部于次年正月內通行各省
巡按已未奏到緣由類題一次兩畿額設三十名以待
國學四方之士今該科欲照會試事例分南北卷兼收
人才不欲有所偏重其意甚善但既分南北必有中卷
分析太多恐屬煩瑣且歲貢入監者少而北方納粟人

等多有意外于科名方一填榜之時不能取盈額數反為難處不如仍舊為便京考外官相見禮節本部前次已會題准考官一至地方止許監臨御史一與相見以避嫌疑此于初到禮儀已無可議矣鹿鳴盛典禮讓相先益無可議從此以後館寓隔別不但六科吏部原有相見成規即在翰林各部平日亦有出使于外者矣今既同奉差遣共事一方為地主者不欲過有分別以傷雅道亦以尊君命而重朝廷也及查會試入簾出簾二

次宴主考官員雖有秩在尚書之下者坐次亦居其上
所據鹿鳴等宴亦宜正考居中副考居左監臨居右乃
見巡按御史為其地方題聘主考初意伏乞聖明裁定
勅下臣等遵奉施行奉聖旨依擬行

禮部題為科場伊邇乞飭典試諸臣嚴斥違式試卷以
正文體以羅真才事先該臣等見得近年舉業崇尚奇
詭大壞士風已經題奉欽依嚴行禁約仍頒舉業正式
以示標準俱通欽遵去後今訪得遠近士子猶多膠守

故習崇尚浮詭殊未舍舊圖新朗然一變者蓋緣此項禁約先年每遇大比亦曾預行申飭及至臨場校閱則近入彀中式者未必皆屬平正所以士心狎玩至于今日雖奉明旨猶復徘徊觀望未有轉移蓋亦主司之過也適今典試諸臣親奉臨遣綸音有嚴如揭日月孰敢不遵且硃卷解部之日臣該會同本科逐一覆校果有故違明禁僥倖中式者將本生參斥考試等官亦分別卷數多寡題請降罰孰敢曲庇所慮應試諸生習見往

年事或仍有不信之心而首鼠兩端不盡所長堅守迷途自甘淪落中有高才不無可惜用是不避瑣瀆再請申飭合候命下移咨都察院轉行兩京監試及各省監察御史除通行禁約外仍于考試官入簾之日大書簡明告示張掛貢院左右人烟輳集之處使各應試生儒的知上意所向堅如金石典考諸臣共承休德必不取違式試卷苟且完責自取不追之罰即諸生有懷竒韞異欲見所長者第能于理致之中發揮旨趣如先年進

士王鰲近日唐順之瞿景淳等儘可馳聲藝苑擅長一代何必湊泊難字如番文鳥篆譯而後知餽釘浮詞如步虛傳偈迥然戾俗而後快哉且近日小考優卷間有一二浮詞已經臣等叅斥然猶俱存其一線之路者則以法禁初行情在可原也今明旨已不啻三令五申而士方被褐挾策之日乃輒忍距違君命詭遇獲禽若以服役在官亦何所望國家亦何取于此人而進用之耶倘僥倖中式雖欲原之不可得矣臣等叨掌風教自知

庸非無可効其轉移之力獨仰藉綸音申告多士及諸
有校士之責者共遵軌轍以襄盛典伏候聖明裁定勅
下臣等遵奉施行奉聖旨是該考試官務遵屢旨取士
其違式卷爾部裏及該科著實叅治亦不許姑息

七月命左春坊左庶子兼翰林院侍讀劉元震司經局
洗馬兼修撰劉楚先主應天試

八月命右春坊右庶子兼翰林院侍讀黃洪憲盛訥主
順天試同試有中書舍人文運熙行人司王沈璟及各

部辦事進士第一名王衡大學士錫爵子也五魁皆出太學而第二人張文柱第三人董其昌第四人鄭國望皆一時同會名士

浙江用翰林院修撰蕭良有江西用侍讀陸可教湖廣用侍講馮琦福建用修撰楊起元

右庶子黃洪憲等疏為文衡重任簡名楊衷懇乞聖明申飭責成以重大典事臣等行能淺薄學術迂疎蒙皇上過聽命主順天鄉試臣等兢兢業業惟不稱任使是

懼且今士風薄惡人心險危或未事而憚主司之嚴明
先為浮言而計阻或既事而忿主司之擯斥肆為誣揭
以中傷考官臨期題請甲乙未定也而即為如鬼如蜮
之計場中糊名易書鬼神莫測也而先有避親避仇之
疑簒弄百端險巇萬狀故今以文場為懼府而謂主試
為厲階臣等聞命驚危誓天相戒所憑者試卷所取者
文章固不敢營私而罔上亦不敢引嫌而棄才此則所
自盟于心以圖報稱者也然語有之前車覆後車誠臣

等深懲往事重慮後艱者方受命而飲冰敢先期而吐
露臣等所受命者主考也主考之嫌疑有二一則先期
撰文恐防漏洩今程文既用士卷已無所疑先洩之嫌
且臨時揭書出題必由同考官擬定然後臣等錯綜緣
手探策而決之自謂可以無私一也一則文字之中疑
有關節今閱卷去取先由同考同考所取臣等乃得寓
目焉同考所棄臣等無由見之近經部議搜求落卷然
亦俟同考官互相檢閱反覆詳校而後臣等因而裁決

自謂可以無私二也顧其間有臣等所不能知者請言
其畧如往年冒籍之禁未伸普天之下莫非王土容有
冒昧而進者不足怪也今三令五申蒐伏已甚萬一猶
有漏網混薦鄉書後或發覺臣所不能知也或游冶之
子平生不習本業臨期賄囑同號襲取他長希圖僥倖
一時失察致有後言臣等所不能知也內簾止閱硃卷
其墨卷在外當謄錄對讀時若有夤緣改竄朦朧謄入
倖而得雋不協輿情臣等所不能知也或彼此相仇而

互揭或才名相忌而謗生臣等所不能知也諸如此類各有攸司今監試臣風裁素著防範加嚴已經告示曉諭諒無他虞但臣等懲前慮後過讓蒐伏不得不預鳴于皇上之前耳今且陛辭入院約同考諸臣申明約束必飭從事校閱務使其細批評寧過于詳有如目力不竭品隲不審臣等之罪也或明珠暗棄魚目濫收臣之罪也至於所不能知者則有司存非臣所能與也請申飭各衙門執事官員遵照節奉明旨愈加嚴密無一滲

漏則不惟弊竇可塞真才可得而足以明主司之心亦
重賓興之大典至于揭曉之後中式文卷如例送科校
勘仍乞命順天府官將落卷送國子監及提學御史分
散下第諸生使各閱批抹以服其心歸與父兄師友無
後言且示之向往以圖後進如是則雖諸生之好事者
亦無容置喙而閱卷諸臣將益矢公矢明不敢潦草塞
責于盛典有光于風俗人心亦有裨矣臣等不勝戰慄
懇款之至奉聖旨科場事宜該部已題明申飭考試官

只秉公閱卷遵照行事監試提調官還用心闔防如有
匿名投揭挾私害人的殿衛及五城御史嚴拿究治禮
部知道

九月監試北城御史毛在疏謂中式舉人李鼎踪跡可
疑覈之則國子監生李一鶚按察副使遜子也初嚷响
南場考官問斥改名入試斥為民

南京兵科給事中杜縻叅中式應天一百三名王國昌
係徽州監生該前科餘姚縣生員胡正道冒籍通州中

順天鄉試已經黜革奉旨著巡按衙門查明開革

十月應天府尹張櫓等題萬曆十六年九月初三日揭曉將中式舉人周應秋等一百三十五名姓名榜示外隨將中式舉人文案依式刊刻試錄進呈隨准考試官當塗知縣章嘉禎呈稱查得四十九名硃卷原係詩經荒字十號職尋墨卷誤將春秋荒字十號拆名曹祖正填榜緣對卷之時燈下慌忙止見號數相同失於查對經書以致錯誤本職罪不容辭合應呈請臣等照得榜

出四十九名係填寫姓名錯誤未經題請奉旨改正不敢擅刊成錄恭候命下之日方敢刊刻進呈誠恐時日稽延臣等不勝罪懼等因又該左庶子劉元震等檢舉事又該南京四川等道御史孫鳴治等題為科舉失錯事又該南京科臣朱維藩奏為科場鉅典將成經房對號差誤懇乞聖明俯賜查處以全盛舉事等因俱奉聖旨禮部知道該部看得科場鉅典法至詳密所取硃卷必查墨卷比對相同方可拆名填榜此定制也今當塗

知縣章嘉禎始而不辨經書謾查字號已失之周章既而不加磨勘輒行拆卷又失之怠忽雖心本無他而責實難諉考試官劉元震等提調官張櫟等惟據本房之呈送不問經義之異同固屬倉忙亦欠精密合候命下將章嘉禎重加罰治以為科場不恪之戒其考試提調等官劉元震等職在統理似與專司其事者不同既行檢舉相應量加罰治惟復別賜定奪再照填榜刊錄原屬一事今榜出已久而錄尚遷延未呈御覽甚非慎重

大典之意合無行令各該府官將原試錄星夜進呈其
誤中四十九名曹祖正相應查革復學肄業仍將本生
并原取詩經荒字十號硃墨二卷解部覆閱以憑上裁
請奉聖旨是章嘉禎着罰俸五個月劉元震等二個月
正月禮部郎中高桂謂我朝二百餘年公道賴有科場
一事自權相作俑公道悉壞勢之所極不能亟反十年
前張居正挾私求進倖門四啟私屬公行王篆朱璉等
尤而效之若以為定例牢不可破者何哉見聞熟而積

習之私難挽也彼居正初壞科場每以意授人忤者立見顯禍能先意承志者則以美官酌之若持左券此其貽玷冠裳至今唾罵者未已也且明憲在前國法在上而犯者接踵相繼致使富室有力者曳白可以衣紫寒畯無援者倚馬不得登龍此忠臣義士所以扼腕而不平也若不一洗而更新之則濫觴日甚不知其何所底止也謹以近日科場有議者為我皇上陳之查得我朝開科取士之制簾以外主防檢簾以內主校閱何善也

邇因各省巡按御史越侵職掌內簾絕不與事寢失初制且弊孔煩興矣萬歷十三年科臣王繼光建議仍復京考之制蒙旨釐正中外翕然然內簾之弊反有甚于外簾者宜臺臣之有辭也累科故實兩京主考必于翰林中資俸深而物望隆者以畿輔首善之地自當選擇而使以故得人斌斌稱盛近因規規資次人得預擬或陰植私交遂至辱大典而羞當世萬歷十六年順天鄉試該府以主試請翰林院具題蒙旨以右庶子黃洪憲

等往隨接邸報見本官一本文衡重任聞命惕衷懇乞
聖明申飭責成以重大典事大畧謂私揭中傷及閱卷
去取全由同考與夫彌封對讀朦朧改竄之弊乞行申
飭等因衆方愕然以為主考自檢飭分耳何至嘵嘵若
此詢之咸謂今歲場屋必至決裂不得不先為張本也
旬日之間滿京喧傳以為某兩浙富人必得華選某三
吳巨室必在前列臣以為道聽未足信也至榜一出大
半符合前言矣揭曉之日士人中有謂某以館穀進某

以里閑交遊進臣尚以此為憎者之口未必至此及聞遺失試卷始信前言有據矣試卷場中最為嚴密未閱之先責在收掌既閱之後責在提調等官且各卷例當送部科校閱者也可信其散逸而不為之所乎昏夜擾擾之際必有收貯之地典守之人此一訊而可明者也乃監試疏中謂禮部委官到場擁雜混失硃卷謬矣臣前科曾為會試提調官知鄉試之終乃會場之始臣于八月廿七日往貢院封鎖什物見千餘人混入詢之乃

附近居民拾取木片柴草天明方行驗出彼時試卷先
同榜出矣何竟無一失耶無知之民肯冒不宥之法而
取必不可得之利耶夫揭榜之先遠近傳言場中失火
後竟不然則今試卷之失毋乃先去以滅其跡乎不知
此欲蓋而彌彰者也奉旨追尋數閱月矣何乃逡巡觀
望宜聞而久不聞也查得禮部題准科場事宜各直省
揭榜之後即將硃墨真卷解部會同該科辨驗是否後
將卷通行覆閱如有文理不通者量行奏斥一二以示

懲戒此非刻也杜漸防奸不得不爾也今各生試卷茫
無下落抑不知所中者為真耶偽耶抑恐以甲為乙移
花接木所不免也且彌封等官多有認記改作之弊今
雖欲辨之無由矣舊例凡士子草稿不完者先行貼出
不准進場今第四名鄭國望稿止五篇執事官若罔聞
知乃巍然掇高科矣縱才邁董賈以典制則悖矣第十
一名李鴻論語篇腹中有一囙字考之海篇直音囙音
匿謂私取貌詢之吳人土音以生女為囙此其為關節

明甚矣孟義大結尾云呼偽而可以為因吾未知新莽之果不可為周公也經書二篇結云傅巖之遇方自以為不世之遭即有賢者豈能盡出其右而曰吾姑待之豈理也哉文義難通又若此第二十三名屠大壯首篇云以後來之識見合諸前此之圖謀以新生之意見合諸初時之謀議有以一夫奏言徹行者中庸篇云道之端由此造其知乎道之端由此造其能乎孟義大結云之噲者流與唐虞爭烈至後場以創作剏以闢作壁以

蚪螭為浮游等字大率不通類此即置之於小試當在
斥降之列況可以玷賢書乎他若二十一名茅一桂
潘之惺二十八名任家相三十二名李鼎七十名張毓
塘即數字數句之疵謬不堪過求然亦嘖有煩言矣夫
士在明經適用而不經之字豈宜妄書順理成章為文
而不通之文豈容收錄且硃卷遺匿真偽難憑公據混
淆辨驗無自不審本房作何評隲主考曾否參訂向來
硃墨卷類為一處何獨至硃卷而遺之昔人場中有用

三十字作冒今奈何互相牢籠恬不為怪耶大抵今之
科舉壞亂極矣士子以僥倖為能主司以文場為市利
在則從利勢在則從勢錄其子以及人之子因其親以
及人之親遂至上下相同名義掃地洪武三十年學士
劉三吾紀善白思蹈等主試至有物議高皇帝震怒一
遣于邊一棄於市聖祖豈無意而重處之哉正謂開科
取士國家大典此而作奸則無奸不作矣此而營私則
無私不營矣臣備員清署非不知包容之為得願義氣

所激不能自己乃敢披瀝血誠上千天聽伏乞敕下九卿會同科道官將順天中式卷逐一檢閱要見原卷見在多少有無積弊逐一查明據實上請以俟處分其餘跡涉可疑及文理疵謬者通行議處以嚴將來之防即將臣重加妄言之罰以謝當事庶公論可明倖門可塞衆憤可泄數十年之錮弊為之一清矣臣又有說焉天下之公與私不並立而人心之疑與信不兩蒙自我朝設科以來豈無公卿之子以才見收者乎而人不之疑

故相張居正諸子先後並進而一時大臣之子遂無有
見信於天下者今輔臣王錫爵子衡素號多才豈不能
致身於青雲之上而人之疑信且半也臣亦乞將榜首
王衡與茅一桂等一同覆試庶大臣之心益明可以信
今而傳後矣奉聖旨這草稿不全事在簾外硃卷混失
事在場後字句訛疵或出一時造次有無弊端著禮部
一併查明來說不必覆試自後科場只照舊規嚴加防
範毋滋紛紛議論有傷國體該部知道

大學士申時行等疏懇恩覆試以昭公道事奏舉人李鴻等還行覆試奉聖旨卿等懇請覆試具見公慎高桂本內有名舉人著禮部會同都察院及該科道官當堂覆試看閱具奏錦衣衛還差官與高桂一同巡視

禮部一本會試屆期乞行申飭前旨以隆賓興盛典事看得禮科都給事中苗朝陽等題稱會試屆期乞行申飭內外簾諸臣校閱闕防當加精慎不得尚竒好異及徇情縱法又該本科給事中李周策條陳五事以裨大

典內除謹撤簾一款先該本部題覆雲南道御史毛在
等條議大畧與本官所奏相同無容別議外所有慎校
文免送試覈試卷嚴謄錄四款相應併議覆開列前件
擬議上請伏候聖明裁定勅下本部通行各該衙門一
體遵奉施行計開一曰慎校文前件臣等議國家專以
文取士非徒欲炫竒弔詭將因言以占其素蘊也往年
文體之弊在于冗長自限字之法行則又流于空虛甚
且文以子史粗疎之字雜以異端隱僻之談而文體益

壞矣去歲已經本部申飭釐正又經頒示正式用為模範所以挽浮詭而還之雅道者已不遺餘力夫何士習日漓積弊未祛今都給事中苗朝陽等欲要經義論策期於平正典雅該博暢達反是雖工弗錄給事中李周策欲要初場限以五百字論策限以千餘字其冗長恠誕及引用佛經等語照辛未科例摘發戒飭俱與本部先今題准事例相同相應再行申儆合候命下嚴行典試諸臣力挽澆風痛革夙弊本部將前申飭文體章疏

大書告示張掛貢院本部門首俾應試舉人往來觀覽
如場中仍蹈前弊不許謄紅或送內簾考官不得取中
違者聽該科叅奏究治其初場論策遵照先年題准限
字不許冗長過限其尤恠誕不經者照辛未科以不得
謄錄例摘發數卷送本部戒飭庶文體漸復于古而真
才自是輩出矣伏乞聖裁一日免送試前件為照國初
士修實行詐偽既鮮防範亦疎邇來人心不古多有奸
詐致玷盛典故乙丑科始有入覲官送試之議遵行已

久今科臣李周策議稱司府有總轄之責州縣有民社之寄欲速其赴任無非為地方計也吏部題稱查點舉人合照近日題覆事例惟用二司已經奉有明旨無容再議直隸府縣官未議及相應議題請合行各省直隸府州縣正官俱候照點舉人其司府首領并州縣官領勅之後即起程無得留滯庶良法並行不悖矣伏乞聖裁一曰覈試卷前件臣等議得場中硃墨試卷收掌原有定員彌封謄錄各有專責邇來詔旨徒勤奉行未至

兩畿失卷覆轍可懲至于彌封謄錄等官往往以進卷
為完事其中遺失多不暇顧似于掄材之典猶有未稱臣
等方欲具題今給事中李周策條議及此委宜申飭合
無行令各分考除將上等硃卷先期呈送主考外其落
卷各封固鈐記備開數目于揭曉前數日交付掌卷官
查無缺少隨即登簿至于墨卷則令曉諭前三日擗
入聚奎堂俟各分考比號對同訖其不取墨卷掌卷官
即檢查細數封貯會經堂同前硃卷於揭曉日付在場

官押送本部交收庶闕防密而意外之虞可免矣伏乞
聖裁一曰嚴謄錄前件臣等議得簾外諸臣職在防閑
一切奸蠹皆當稽察邇來飭法申令可謂嚴密但日久
弊生不無怠玩以故科臣苗朝陽李周策欲要嚴責簾
外諸臣用意闕防殫精振飭俱于試典有裨相應題請
合無行令監試提調等官入場之初責令兵番官軍人
等嚴加防範如有搜出真正懷挾識認果係倩代并同
號簿傳遞互換者許即時首告照例枷號示衆問革至

于場屋取士全憑硃卷以為去留則彌封謄錄對讀等
所尤為緊要一有脫誤即文堪中式未免淪棄今後各
所官員務要親加查對加意防閑毋得專委吏書生員
以致差錯如有三場硃卷字號不同字畫糊塗脫落此
數者許監試官指名參究庶上下交警而宿弊可除矣
伏乞聖裁奉聖旨墨卷于填榜之日送進原係闕防只
照舊規其餘依擬行

二月禮部一本科場生儒阻撓搜檢賈衆騷擾事覆山

東巡按吳龍徵題生儒馮鎮等阻撓搜檢杖斥為民胡東潮等分別降級中式舉人賈三鳳發國子監肄業三年令其改省臨期再考方准會試奉聖旨是

禮部疏為懇恩覆試以昭公道事該禮科抄大學士申時行等奏前事奉聖旨卿等懇請覆試具見公慎高桂本內有名舉人著禮部便會同都察院及科道官當堂考試看閱具奏錦衣衛還差官與高桂一同巡視欽此欽遵抄出到部除禮部尚書朱賡偶感傷寒註籍不與

外左侍郎于慎行等謹會同都察院等衙門都御史等
官吳時來等於本月初一日黎明至本部堂上公同揭
書出題嚴加覆試隨將原卷彌封從公品隲看得七卷
文理平通一卷文理亦通臣等奉旨看閱未敢擅擬將
覆試原卷各貼浮籤實封隨本進呈御覽伏乞聖裁奉
聖旨這覆試舉人你們既會同看閱文理俱通都准會
試

刑部雲南司主事饒伸疏謂邪臣朋奸欺君徇私滅法

懇乞聖斷以培公道以快人心事臣竊惟權柄皇上之所獨馭也主上人臣之所共事也而奸邪人心之所共惡也名器不可以假人况賢科乎犬馬報主階草指佞神羊觸邪况臣子乎今邪臣所為罔上行私者莫如科場之弊臣有慨於中久矣夫科目者國家所以鼓舞天下之大權大柄也君不得以私諸臣父不得以私諸子法至公也故古之奸臣多矣而鮮有壞此法者畏人以三尺議其後也惟唐達奚恂中楊國忠二子宋湯思退

中秦檜之子若孫書之史冊以為醜詆此亦曠世一見耳未有人人冒濫如今日之甚者自舒鰲何洛文中張居正之子人猶以為駭也及三子連占科名而輔臣乃遂成故事於是戴光啟沈自邠並收二相子而恬不知怪一時用事大臣乘此而得所欲者不可勝數也然未有大通關節肆無忌憚如黃洪憲之為者以為一第不足以為重則居然舉首矣勢高者無子則錄其壻利重者非子則及其孫矣洪憲之情狀已見于陞辭一疏及

拆卷對號之日反覆搜尋盡中所私而後已非惟敢于欺皇上且空天下為無人焉故榜出而人人切齒無不欲唾洪憲之面而咎其背也幸有禮臣高桂之發其奸也據所指字眼關節雖才有可錄猶當亟以徇私棄之況文理訛謬章章若是而猶俱得保全洪憲覲然在列臣恐皇上有此不復有國法矣臣聞覆試之日尚多不能文者左都御史吳時來不分可否輒曰通得高桂面斥之而時來忍恥力持竟爾朦朧擬請夫始猶掩耳盜

鈴今則入市攫金始猶一人為欺今則朋黨面欺矣此何可令後世見也臣又見大學士王錫爵之辯疏內舉祁奚為言夫奚之舉子自舉也豈假手於人哉即此一言而為私弊亦不能自解矣且字字劍戟而其中有曰突出一高桂尤非大臣之語錫爵為相三年矣不聞與人為善而聞與人飾非自錫爵趨邪而忠臣賢士悉被斥遠佞夫憊人躡躋顯要今又巧護其私以凌轢正直欺誑皇上其勢又將為居正之續矣臣竊觀皇上仁聖

聰明抱大有為之資而邪臣壅蔽欺罔致大權大柄不由皇上而由邪臣天下後世將以此為聖明之累矣夫邪臣共享壅斷之利而令皇上獨受不察之名此臣所以終夜拊心不愛一身以報也豈願碌碌與貴子弟比肩事主以為科目之羞郎署之玷哉今會試事又將竣矣臣恐復有觀望效尤者伏乞皇上大奮乾斷將高桂所論徇私舉人嚴究斥退發下覆試原卷九卿科道從公細閱量留一二可錄者以示聖恩重治黃洪憲作奸


市私之罪以為人臣欺罔之戒至於吳時來附勢滅法
不稱臺長王錫爵庇黨恃勢殊乏相度均乞速賜罷斥
如是而公道可培人心自服他日之流弊永絕於此舉
矣臣昧死披瀝干冒天威不勝戰慄隕越之至奉聖旨
科場之事已經各官條議積弊已革王衡等又經覆試
若有欺弊科道豈無言者饒伸這廝妄言排擊大臣刁
訐輔相好生無理顯是黨護高桂朋奸逞臆甚失國體
饒伸著拿送鎮撫司究問朋黨主使來說

鎮撫司奏奉聖旨既究問明白饒伸儉邪小人出位逞臆誣謗大臣混淆國是本當重處念輔臣奏救姑着草了職為民高桂雖未主使亦是朋黨着降二級調邊方用

二月命少傅兼太子太傅禮部尚書建極殿大學士許國詹事府掌府事太子賓客吏部左侍郎兼侍讀學士王弘誨主會試取中舉人陶望齡等

廷試賜焦竑吳道南陶望齡及第五月改進士王肯堂

劉日寧顧際明莊天合董其昌蔣孟育區大相黃輝馮
有經傅新德周如砥朱國禎喬胤唐儼純林堯俞孫羽
侯徐彥登包見捷羅棟吳鴻功馮從吾郭士吉為庶吉
士命吏部左侍郎太子賓客兼侍讀學士沈一貫禮
部左侍郎兼侍讀學士田一儵教習



弇山堂別集卷八十四